

2002

Das sind Hofa-Häxä Bängg...  
Wenn Dir uns Isoed hän dr's Gschängg...  
Stöhnd uff und mached alli mit..  
Denn wird die Fasnacht e riesä Hit...

S'Komitee duet s'30igste Jubilierä  
Für das hän si extra e neus Logo lo kreierä  
Doch wo mer das gseh hän mien mir lang studierä  
Worum hän si die Sau zunere Chue lo mutierä

e neu Manie het uns alli befallt  
Es wird ghäxt zauberet das duet is gfalle...  
Doch weder Copperfield's no Potter's chönne is s'Wasser reiche  
s'einzig wo sie uns vorus hän sie chönne stehend seiche

Trulla Di Rulla, Trulla Di Ho, Trulla Di Hulla, es isch halt eso...  
Dr Pfarrer vo Hofstette isch wieder am Gnäse  
Im Hofstetter Biechli hän mir e Bricht gläse  
Viel drvo isch is aber nid bliebä  
Nur dr Satz er sig dr Arche entstiegä  
Trulla Di Rulla, Trulla Di Ho, Trulla Di Hulla, es isch halt eso...

E Testfahrt het er welle mache  
Dr Martin und sis neue Fahrzüg mit dä 1000sig Sache  
Aber leider isch er nid lang go faahre  
Den e Uswiis het er nid für dä Chaare

D'Moral vo dere Gschicht wäm mir au no verzelle  
Me hez nit öbbe dr Wage emene Andere gä welle  
Nei, für dr Martin wird er uf fünfevierzig plombiert  
Bravo Hofstette do wärde mer sicher für's Benzinspare prämiert!

E bluetigs Aug Dr Zechä broochä  
E zerrig do dort gstuuchti Chnochä  
Nei Wrestling luege mir do nid  
Das sin d'Soleita-Verletzigä im Schnitt

E Schwiz ohni Swissair isch nid dänggbar gsi  
In Konkurs laufe het me seh loo ohni viel überlegge drbiidrumm biete mir Euch als Neuheit jetzt a  
E Direktflug uf em Bäse bis uf Florida

Vor zwanzig Joohr hän sie dr Schuelhuus-Brunnä verbotte  
Hüt hets e neue Spielplatz gäh wo nid mehr bringt als dräggigi Klamotte  
Söll dä Brunnä jetzt wäg oder aaannne  
Mir frooge is duet dr Gmeinroot immer eso plane?

Kei Kiosk wenig Beize und öfters kei Denner  
Hofstette isch wirtschaftlich nüm so dr Renner  
Zum Glück bleibt is an dr Fasnacht no d'Schüre vom Heinz  
Über ds freue mir is so drumm nämme mir no Eins

Für d'Rotznase mache mir khei Kuechä  
Mir händ aber nid lang nacheme Gschänggli müesse suechä  
Churz und bündig singe mir im Choor  
Mit däm Bangg gratulierä mir zum 10te Joohr

